

四庫全書

史部

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷二十九

蠲賑二

雍正七年己酉二月辛丑

上諭內閣浙省為財賦重地民力輸將朕所軫念其舊欠
錢糧非不欲開恩豁免祇以屢年未完之項乃頑戶之
所拖欠若以抗正供而需膏澤則頑民獲利而良善轉

未邀恩非所以化導人心風俗也今據性桂摺奏浙省紳士庶民咸能知朕教養之殷懷感朕訓誨之至意踴躍完納正賦即此一事可以見其感恩遷善之誠朕實為浙省之士民風俗稱慶非重此數十萬之國帑也浙省嚮善之速甚屬可嘉用沛鴻恩將雍正七年額徵地丁屯餉錢糧蠲免十分之二共計六十萬兩著李衛轉飭各屬恪遵奉行務使閭閻均霑實惠竝將朕加恩獎善之意遍行宣諭俾遠鄉僻壤咸共知悉

癸卯四川巡撫憲德奏上年九月間瀘州里民呈稱軍需米石情願捐助臣見永寧建昌各路軍糧俱派就近州縣里民背運實屬勞苦而瀘州里民亦在派撥之內是以未允所請

上諭戶部朕前見崇慶州紳衿士民好義急公風俗淳厚深為嘉悅是以格外加恩蠲正賦以示獎勵今據撫臣憲德陳奏知瀘州里民曾經具呈在先且瀘民既有背運軍餉之勤勞又有樂助倉儲之忱悃雖撫臣未允所

請而民情之忠厚善良實為罕見著照崇慶州之例將
雍正七年額徵錢糧全行豁免巡撫憲德務體朕心轉
飭該州恪遵奉行使閭閻均霑實惠儻諭旨頒到之日
有已徵在官者准其抵算庚戌年額賦

三月丙午

上諭內閣總督田文鏡公忠歷練自蒞任豫省以來撫綏
化導以實政實心為察吏安民之本是以風清弊絕吏
畏民懷地方舒暢之氣感名

天和數年之中年穀悉登豐稔該督之功實為可嘉兼該省紳士庶民風俗向來醇樸又能遵封疆大臣之教人向義輸忠以受

上天之恩實可謂良民矣夫因荒歉而蠲免正賦者乃賑窮恤困之意若羣黎共敦善行以迓

天庥屢歲有秋災祲不作則賞善旌良朕之加恩沛澤更為愉快著將豫省雍正七年額徵錢糧蠲免四十萬兩總督田文鏡可確查分數通行所屬州縣一體遵奉使

間閭均霑實惠

六月乙酉

上諭內閣朕愛養黎元遐邇一體而邊遠之地小民家計不及近省尤朕心之所繫念數年以來甘肅四川雲南貴州廣西五省有用兵西藏及勦撫苗蠻等事其一應軍需皆動用公帑備辦秋毫不派及於民間而糧餉轉輸亦有資於民力今藏地苗疆俱已寧謐朕心嘉慰特沛恩膏著將庚戌年甘肅四川雲南貴州廣西額徵地

丁銀兩悉行蠲免其西安各屬地方近日亦有預備軍需之事朕心軫念著將庚戌年額徵錢糧蠲免十分之三此六省督撫大吏宜仰體朕心轉飭所屬有司敬謹奉行務使閭閻均霑實惠如有奉行不力被不肖有司暗飽私囊或姦胥土棍強紳劣衿包攬侵蝕者經朕訪聞必將通省大小官員分別從重治罪至於國家設官本以理民官有恤下之責民有奉上之義若設官而不為計及養廉之資則有司之賢者將窘迫而莫能支不

肖者又橫取而無所檢是以酌定將錢糧耗羨均給各官此揆情度理上下相安之道但思加恩百姓豁免正賦若將耗羨一並蠲除是民雖邀額外之恩而官員轉有拮据之苦上司或因此稍有寬假則必致巧取苛索於民流弊種種轉多於耗羨之數於吏治民生均無裨益著於庚戌年為始凡遇特恩蠲免錢糧者其耗羨仍舊輸納諒必民所樂從若因水旱蠲免者不得徵收耗羨將此永著為例

八月癸丑

上諭內閣自古帝王之治天下設官分職不得其人則庶政莫由振舉而理財不得其道則國用不足雖欲減賦蠲租沛膏澤於萬姓其勢有所不能此自然之理也數年以來怡親王大臣等辦理戶部事務敬慎公忠風清弊絕阜民裕國府庫充盈國家經費既敷則蠲除惟正之供施恩常格之外使羣黎百姓俯仰有餘乃朕寤寐之至願也昨署山東巡撫費金吾奏稱今歲東省秋成

大稔父老皆言二十餘年以來所僅見朕思此乃督撫之賢有以感召

天和也則凡為督撫者宜何如之敬謹居心公忠奉職以不愧屋漏之誠為感格

上天之本耶聞今年秦省西安一帶夏月甚旱而地方文武大臣官員罔知修省此則封疆大臣之所當切戒者朕非却責於臣工而屢頒此等諭旨也蓋實有見於天人感應之理纖毫不爽而夙夜敬謹乾惕覺鑒觀之有

赫而呼吸之可通儻朕心有一刻之懈弛而徒以訓誡之詞責諸臣下其又何以對越

天地神明乎又據廣東督撫布按等奏稱今年粵東雨澤均調百穀順成合計通省米價自八錢至五六錢實粵省從來希有之事朕聞之深為慰悅此皆該省民人等革薄從忠醇厚良善之心

上天垂佑而錫以豐穰之所致也著將山東廣東二省庚戌年地丁錢糧各免四十萬兩以獎地方官民之善直

隸陝西今年各蠲銀四十萬兩庚戌年著再各免地丁
錢糧四十萬兩山西通省連歲皆獲豐收著免庚戌年
地丁銀四十萬兩安徽等屬亦著免庚戌年地丁銀四
十萬兩此六省共蠲免額徵銀二百四十萬兩乃朕加
惠閭閻之特恩該督撫等應轉飭有司仰體朕心敬謹
奉行務使小民均霑實惠儻不肖官吏及紳士土豪等
有侵蝕包攬等弊一經發覺定行重治其罪並將失察
之督撫上司等嚴加議處

九月甲戌

上諭戶部據寧遠大將軍岳鍾琪奏稱自西安起程歷西
鳳平臨以至甘涼等處小民承辦軍需莫不踴躍歡呼
趨事赴公爭先恐後而靖逆衛屯民於應辦草束之外
情願另備餘草運赴大東渠站所堆積以佐軍需等語
靖逆遠處邊外人民無幾而自備割運草束輸力効誠
可見師以義行統領大臣又能令承辦軍需各員無絲
毫扣剋是以輿情鼓舞相率辦公朕心深為嘉悅著將

靖逆衛庚戌年應徵正糧馬糧四百六十石零大草五千三百八十八束全行蠲免以示加惠邊民急公之至意

己丑

上諭內閣年來用兵西藏勦撫苗蠻一切辦理軍需皆動支公帑而糧餉轉輸不無資於民力朕心深為軫念是以降旨將甘肅四川雲貴廣西五省庚戌年地丁錢糧全行豁免查甘屬之河西四府如寧夏西寧及甘涼肅

以至嘉峪關外之靖逆赤金柳溝等衛所歷來額徵俱係糧料草束與各省額徵折色無異今當用兵之際雖絲毫不派及民間而黎民踴躍急公之意大將軍岳鍾琪屢次奏聞甚屬可嘉著將額徵本色加恩豁免以示惠愛邊民之至意

十一月丙子

上諭內閣前因北路軍需須用駱駝鞍屨諭令山西地方製辦聞該省民人凡有羊毛繩料之家各出所有赴官

領價工匠亦一時爭先應募共計二十餘萬件之物料
工作不勞而集於月餘之內此皆該省大吏平日善於
訓導民人其製辦器物僱募人工又照數給與價值而
該省民人又懷尊君親上急公趨事之心是以備辦軍
需羣情歡躍剋期告竣甚屬可嘉巡撫石麟布政使蔣
洞著交部議叙凡委派辦理之員亦著議叙再將該省
辛亥年額徵地丁銀蠲免二十萬兩於辦理鞍屨之各
州縣按畝均派使小民共霑實惠以示朕恩獎官民之

至意

雍正八年庚戌六月己未

上諭戶部甘肅地方雍正八年地丁錢糧前已降旨蠲免其河西四府州縣暨各衛所額徵糧料草束又經一體免徵朕念新歸內地番民嚮風慕義願附版圖其地畝額徵本色糧草與河西等處賦稅相同亦應一體蠲除俾令同霑恩澤著將雍正八年河東之河州廳洮州衛歸德所河西之西寧涼州府屬應徵番糧共一萬二千

有奇俱加恩蠲免該督撫卽督率所屬有司敬謹奉行
俾番民均霑實惠

七月己卯江南河道總督嵇曾筠奏河水暴發情
形

上諭內閣今年春夏之交北方雨澤畧少朕卽慮夏秋之
間雨水必多屢諭河臣加謹保護工程以防伏秋之汎
今觀湖河漲溢情形有非人力所能捍禦者朕惟有修
省戒懼以凜

上天示儆之深恩更念邳州宿遷桃源等處水勢驟長禾稼室廬必遭淹沒深可憫惻著差往江南清查錢糧之侍郎馬爾泰彭維新御史安修德等星赴被水地方動支藩庫銀數萬兩速行賑濟並遴選廉幹人員帶往分派各處會同地方官悉心辦理勿稍稽遲勿令遺漏務使窮民人人安堵寧居咸得其所其被災之處今年額徵錢糧著悉行蠲免儻有已經完納者准作明年額徵之數聞山東發水之處民間田舍亦被損傷著巡撫岳

濬遴選賢能官員前往查勘動支庫銀速行賑濟勿使
一人失所其應行蠲免錢糧之處著一併確查奏聞請
旨

八月己亥

上諭戶部前聞直隸地方有被水之州縣朕心軫念已星
遣侍郎牧可登副都統阿魯等分路前往蠲賑兼施茲
據署督唐執玉奏稱各屬被水情形消長不一有上諭
所及之處而水勢消落可免成災者亦有上諭未及之

處而田廬被災急須拯恤者著行文交與牧可登阿魯等照該督所請悉心查勘核實通融其前諭未及之處有應行賑濟者即交附近差往之大臣官員等速行料理務令得所以慰朕拯恤災黎之至意

是日

上諭戶部據河東總督田文鏡奏報山東被水各州縣朕已降旨諭令動支銀穀加意賑恤茲聞萊州府屬之昌邑壽光濰縣青州府屬之益都沂水博興高苑臨朐濟

南府屬之鄒平等縣俱被水患民舍田禾不無傷損著
該督撫委員查勘應否與從前所報州縣一體加恩之
處一面辦理一面奏聞儻再有續報被水者亦著遵照
前旨速行料理毋使稽遲

丙午

上諭戶部向來蠲免錢糧額徵漕米不在所蠲之內今年
山東地方被水稍重而直隸江南河南三省亦間有被
水之州縣夫地方既已歉收則漕米輸將未免竭蹶著

將山東被水之州縣漕糧全行蠲免直隸江南河南被水州縣之漕糧按其成災分數蠲免其山東未被水州縣應完漕糧不必運送京師即留於東省以充兵餉

九月甲申

上諭內閣朕臨御萬方宵旰勤求惟以愛養斯民為念數年以來除租減稅疊沛恩膏不但旱澇歉收之處蠲賑兼施即該省年穀順成不須寬賦而朕欲使民力饒裕每加格外之恩蓋國家經費既敷則富藏於民俾各家

給而人足乃朕之至願也查各省錢糧朕特降諭旨蠲免者已多今次第舉行應及於江西湖北湖南三省著將辛亥年三省額徵錢糧各蠲免四十萬兩又念直隸乃畿輔首善之地應沛殊恩山東今歲被水之州縣稍多朕心甚為軫念除二省滂溢地方已加意賑恤並將本年額賦照例蠲免外著將辛亥年二省錢糧各蠲免四十萬兩以上五省各該督撫應仰體朕心嚴飭有司敬謹奉行務令閭閻均霑實惠

十一月庚辰戶部議覆河東總督田文鏡奏稱今年豫省被水州縣收成雖有不等實未成災且士民踴躍輸將所有奉

旨蠲免之漕糧請仍照額完兌應如所請

上諭曰士民等急公奉上甚屬可嘉但被水州縣雖未成災而收成分數既有不等著該督確查歉收分數仍照例蠲免即將現在已兌漕糧准作辛亥年正供以示朕嘉惠豫民至意

雍正九年辛亥正月戊辰

上諭內閣朕思惠養黎元之道莫先於除賦蠲租使萬姓均霑渥澤陝西甘肅二省經理軍需數年凡米糧芻牧車馬牲畜之類皆動支公帑備辦一絲一粟不使擾民然朕每念地方既有軍務縱不取辦於民財未嘗不資藉於民力而陝甘二省之民人踴躍趨事甚屬可嘉年來已屢降蠲賦之旨茲特再沛恩膏將雍正九年西安所屬額徵地丁銀蠲免十分之三甘肅所屬額徵地丁

銀全行蠲免該督撫等可轉飭有司敬謹奉行務令閭閻均霑實惠

丁亥

上諭內閣山東地方上年遭值水患窮民乏食朕心軫念屢頒諭旨并遣大臣賜粟賜金加恩賑濟不忍使一夫不獲其所又念該省上年禾稼歉收則今春青黃不接之時米價必致騰貴特命截留鄰省漕糧三十五萬石撥運奉天米穀二十萬石減價平糶以惠濟閭閻朕之

為東省民食計者亦備極籌畫矣細思上年濟兗東三府之被水較平時為甚今發粟平糶固不慮價值之高昂而赤貧之民仍苦於糶買之無力且聞被水之後有餬口轉徙四方者今各省漸次資送回籍此等民人回籍之後無以為資勢必至於失業深屬可憫著侍郎劉於義牧可登巡撫岳濬確查實在窮民無力糶買穀石者再給兩月口糧以恤其困苦資其耕作查濟兗東三府尚有存倉穀四十萬石即將此為散賑之需儻不敷

用再將截留之漕米以二十萬石平糶以十五萬石增
添散賑著該侍郎等遴選賢員作速分途辦理使黎民
均霑實惠并傳宣朕旨曉諭百姓等受朕格外之恩當
乘此春和努力耕種勿因失業而作邪僻之事勿因困
厄而懷怨尤之心果能祇遵朕訓則豫順之氣自能感
召

天和賜以安全之福思之勉之

庚寅

上諭內閣上年江南邳宿等十八州縣遭值水患窮民乏食朕心深切軫念特命大臣會同該督撫動帑發粟撫綏賑恤增給口糧之數加添散賑之期並賞給修葺室廬之費務使被水黎民咸登衽席今據該督撫等奏報正月十五日已滿散賑之期朕思江南麥熟在四月之杪其間青黃不接之時尚應為之籌畫雖本省鄰境皆有平糶之米穀而赤貧之民無資糴買者仍復艱於餬口深可憫惻查揚州鹽義倉有積穀數十萬石原備賑

濟之用著動支二十餘萬石加賑窮民四十日口糧以濟其困乏資其耕作該督撫會同欽差侍郎彭維新等悉心奉行並曉諭百姓乘此春和盡力南畝勿再游手失業有負朕恫瘝軫恤之至意

二月戊午

上諭內閣從來備辦軍需於地方不無勞費朕深知其弊惟恐累及民間是以於征勦準噶爾之舉悉心密籌於數年之前一絲一粟皆用公帑而民間並不知國家將

有軍旅之事從來未聞預備軍需地方能如此毫不騷擾者也此天下所共知更為三秦百姓所深悉者及至大兵既出時日既多輓粟飛芻脂車秣馬雖不取辦於民財恐不免借資於民力此亦事勢之不得不然祇以準噶爾狡獪兇頑父子濟惡實蒙古之巨患為國家之隱憂若因循苟且縱賊養姦則狡寇一日不滅邊境一日不寧即內地之民亦一日不得休息此朕熟思詳審至於再三而出於萬不容已者並非好大喜功利其人

民土地而為此舉也即以上年之事言之賊夷先遣使臣詐稱求和及朕降旨暫停進兵而賊衆乘我不備大肆猖獗然則此等狡寇顧可置之度外聽其貽害於邊方哉即此愈見

聖祖皇考當年不得已之情朕今日繼承

先志不能不辦理之苦衷也惟是國家設兵所以衛民今因用兵而有不得不資民力之勢朕心實為憐憫是以年來屢蠲陝甘二省額徵錢糧使羣黎均霑膏澤而三

秦紳士庶民感激國恩兼明大義踴躍趨事志切急公
二十年來如一日朕實嘉之如昨歲據督撫奏報甘肅
士民等有願捐車輛以資輓運者有願捐草束以供芻
牧者朕皆降旨一一照數給與價值而其服勞宣力之
誠悃亦大可見矣今年添辦軍需朕又切諭督撫有司
等體恤民情不得絲毫擾累其糧餉運費特令加增儻
再有不敷仍令據實陳奏無非軫念民勞之意惟望陝
甘二省紳士庶民等歡欣鼓舞勿懈初心則和氣致祥

仰邀

天眷不數年間必見膚功克奏不但邊城內外共享寧靜之福即爾等世世子孫永保安居之樂矣查雍正九年甘肅所屬額徵錢糧業已全行蠲免西安所屬額徵錢糧前降旨蠲免四十萬兩著再蠲免四十萬兩以昭朕體恤之恩該督撫務飭有司敬謹奉行使閭閻同受實惠并將此旨刊刻頒布俾陝甘二省遠鄉僻壤之民共知之

己未

上諭內閣上年秋月山東地方山水為患即聞河南亦有數縣被水朕以總督田文鏡身在地方自能經理妥帖冬間見總督邁柱奏摺知豫省被水之民有覓食餬口於湖廣者該省已陸續資送回籍朕又切諭田文鏡督率有司加意撫恤且念豫省連歲豐稔今不過數處歉收自可支持度日不致困窮失所是以未遣專官前往查賑今聞祥符封邱等州縣乏食窮民沿途求乞而村

鎮中更有賣鬻男女為山陝客商買去者田文鏡欲將
說合之中保媒人拘拏懲治至於鄉村有糧之家多被
附近窮民呼羣覬覦於昏夜之中逼勒借貸有司不能
究問朕聞之深為駭異朕以愛養百姓為心惟恐一夫
失所即如上年直隸山東江南被水之州縣朕皆疊沛
恩施豈獨於豫省之民靳茲膏澤田文鏡近來年老多
病精神不及故為屬員所欺誑耳夫賣男鬻女之事在
平時亦有之此乃出於本人之情願非官長所可禁止

者至於荒歉之歲自以撫綏安插使民不至離散為第一義若不能撫綏安插而但禁其賣鬻子女以避離散之名是絕其生路也豈為民父母者所忍言乎刑部侍郎王國棟向曾在豫省居官著給與欽差大臣關防馳驛前往將被水之州縣一一查明飛飭該地方官動用本地倉穀錢糧核實賑濟務使窮民咸登衽席不得稍有遺漏俟麥熟之後奏聞停止儻地方官奉行不善怠忽從事著王國棟嚴叅重治其應行緩徵之州縣著傳

朕諭旨即行緩徵以免追呼之擾

三月乙亥湖廣總督邁柱遵

旨將沔陽州實在民欠糧銀三萬二千餘兩分晰造冊具

題

上諭戶部朕愛養元元時下減賦蠲租之詔每思豁免除舊
欠則頑戶獨蒙恩蠲免新糧則善良均被澤此亦情事
之易知者惟是沔陽民欠與他處不同該州近水常有
滂溢之患朕所深悉其未完民欠銀兩著從寬豁免

四月乙未

上諭內閣朕因直隸州縣之被水不過近河村莊其他高
阜之處收成豐稔彼此可以相資不致艱於謀食是以
未頒加賑之旨今聞畿南州縣之中有被水輕重之不
同其被水輕者民間可以支持而被水稍重者即有日
食不敷之慮即如大名府屬之長垣東明開州等處皆
地勢窪下之區失業之民甚覺艱窘恐其他州縣亦有
與之相類者今去麥熟之時尚有月餘應籌接濟之道

以資其耕作若從京師遣官分查必致稽遲時日副都
統趙弘濟係上年散賑之員著馳驛前往保定會同該
督唐執玉布政使王謩等查閱上年散賑檔案將其中
被水稍重應行加賑之州縣一一確查明白遴選賢員
星速分途前往會同該地方官或動倉穀或動帑銀核
實散賑至麥熟之時停止儻奉行不力或有遺漏浮冒
等弊經朕訪聞定將大小官員從重議處

雍正十年壬子閏五月丁酉

上諭八旗官員人等朕自御極以來普天率土未嘗岐視而八旗人等尤國家教養百年望其遂生復性共享安樂於久遠若其中頑劣貪鄙之習故加寬縱將為人心風俗憂無所底止朕實不忍聽其陷溺不為援手有負皇考之付託也從前嚴治貪婪清釐帑項即追呼牽擾有所不恤誠欲八旗人等各思罪愆漸自醒悟知有所不為庶無往不利此朕訓愛之初心也昨於雍正三年以前虧空各項令查奏酌免諭旨內業經明白曉諭今特

再沛恩膏將雍正三年以後九年以前八旗官員人等
應追銀兩除本身虧空侵蝕借帑及貪贓盜用等項不
准查免外其有年遠之案於雍正八年恩旨以後發覺
者與本身已故著落子孫追賠坐扣俸餉抵補者或本
身雖在其應追之銀實係分賠代賠無著之項或因公
那用並未入己者又或應追之本人已經豁免而開欠
之人尚在著追或本身已經寬免而在奉旨以前報出
田房人口抵補其間人口病故田房變價不敷仍行追

補者著該旗將各項情由造冊開送內閣轉奏候朕酌量分別加恩寬免此次諭旨著再遍傳俾八旗人等深知朕恩恪遵朕訓洗心滌慮痛改前非循理奉公謹身節用以副朕教育淳誠之至意

七月壬辰

上諭內閣甘肅地方年來預備軍需雖事事取辦於公帑而百姓輸輓効力亦甚勤勞朕心軫念屢加恩澤聞今歲蘭州平涼西寧等府所屬州縣內有電損蟲傷之處

已諭該督撫留心賑恤停止催科嗣聞從前雨少之處俱已霑被甘霖秋成可望朕心深慰因念甘肅為軍需總匯之區百姓急公趨事所當格外加恩以昭朕子惠元元獎勞賞善之至意著將河東河西各屬民戶屯戶及番民等本年應徵各項銀米草束一概蠲免若有已經完納者准作來年正賦該督撫等務體朕心督率有司敬謹奉行俾秦民均霑實惠儻有豪胥猾吏舞弊作姦使澤不下逮者經朕訪聞定將該管大小官員嚴加

議處

雍正十一年癸丑正月庚寅

上諭內閣上年江南沿海被水地方如常熟等二十二州縣並續報之華亭等六縣該督撫等已遵旨軫恤定議大賑三次每次以一月為期料寒冬初春以來窮民存養有資不致失所矣朕念二三月間正青黃不接之時尚須籌畫接濟資其力作庶可無悞春耕著再加賑四十日其有從前遺漏貧民並前可餬口而目下力不能

支者俱著查明添入補賑之內再被水之鹽場竈戶亦照貧民例加賑一月該督撫鹽政務須督率有司實力奉行使被水之家均霑恩澤以副朕恤災拯困之至意

六月己未

上諭內閣據署河南巡撫孫國璽奏報豫省歷年耗羨銀兩除本地公事支用外現存司庫銀七十萬兩有奇又社倉存貯穀麥等項共計二十八萬石有奇等語從前提解耗羨本是澄清吏治休養民生之意屢經降旨此

項出自民間若本地公用充裕之時朕仍當加恩本地官民使之霑被惠澤不令歸入公帑也今豫省存貯耗羨既有七十萬之多而該省官員等所得養廉又已敷用正當加惠閭閻俾令邀恩格外著將河南本年地丁錢糧蠲免四十萬兩即以存貯之耗羨照數撥補還項該督王士俊可督率有司敬謹奉行大凡耗羨多餘之省該督撫藩司等往往不甚愛惜並不為百姓計而存摶節之心若伊等留意民生儲蓄充盈亦可為加惠編

氓之助矣

七月己亥

上諭內閣直隸山東地方自去冬以及今春雨雪稀少朕心憂慮為民虔誠祈禱幸蒙

上天垂鑒疊沛甘霖遠近霑足目前秋禾秀實大有豐稔之象朕心不勝感慶茲據直隸河道總督王朝恩奏報知近水低窪之地因伏雨稍多河流漲發禾稼被淹人口亦有傷損者朕心深為憫惻著直隸總督山東巡撫

遴選賢員速行查勘或勅倉穀或勅帑銀確實賑濟務令被水窮民均霑實惠

雍正十二年甲寅十月癸丑

上諭內閣今年六月間江蘇地方雨水稍多州縣低窪之地有被水淹浸收成歉薄者朕心軫念且恐將來米價漸昂不可不預為籌畫著將乙卯年江南起運漕糧截留二十萬石於被水成災之州縣各就近留一萬石或五六千石於被水不成災之州縣量留三四千石俟開

春市價增長之時將此平糶以便民用其成災田地應徵新舊條銀若仍行徵輸小民不無竭蹶著緩至來年麥熟開徵再本年應徵南漕等米亦准緩至明秋折納所有被災地方無力乏食之窮民據該督等奏稱已動公項酌賞但冬春之際此等民人覓食艱難應動支倉穀分別賑濟毋令失所著該督撫悉心辦理並督率有司實力奉行務令均霑恩澤

十一月甲午

上諭內閣今歲春夏之間陝西地方禾麥頗好及至仲秋
聞有雨少之州縣如甘肅所屬則有階州靖遠環縣等
處西安所屬則有臨潼渭南高陵涇陽三原醴泉富平
同州郃陽澄城韓城朝邑華州華陰蒲城潼關以及榆
葭二府州所屬等處朕心深為軫念特諭該督撫速籌
蠲免賑恤並轉運接濟之策務使貧民不致失所茲據
劉於義許容奏稱階州靖遠環縣新舊錢糧已概行停
徵至乏食之民已照例借給口糧統俟夏收徵還其他

州縣有一村一堡被旱薄收者亦照階州等處之例辦理等語據史貽直碩色奏稱西安所屬州縣秋間雨澤愆期嗣於九月內大沛甘霖所種之麥滋潤暢茂明歲夏收可望現在糧價有減無增約計本地存貯穀石足以接濟明春之用至本地錢糧百姓感戴皇仁且值連年豐稔已經完納十之八九亦無庸加恩蠲免惟從前借糶之穀糧應於秋後還倉者今西安同華榆葭等府州既有薄收之屬請暫緩徵買統俟明秋還項則民力

可紓等語劉於義史貽直等所奏地方情形已悉階州等三州縣乏食民人所借之口糧俱著賞給明年夏收時不必徵還所有本年未完之錢糧亦著蠲免明年不必補徵其應徵舊欠著概行停止仍令劉於義許容督率有司加意撫綏務令小民得所至西安同華榆葭等府州屬百姓所借之倉糧亦著賞給明年不必交還其糶出之穀著史貽直等酌量於明年買補還項

雍正十三年乙卯五月甲辰

上諭內閣西陲用兵以來一應軍需皆取資於公帑絲毫
不以累民惟是甘肅等處運送糧餉不能不藉民力之
輓輸朕心軫念屢沛恩膏即當豐稔之年亦下蠲租之
詔所以賞百姓之急公示朕心之體恤也茲聞甘省所
屬地方入夏以來有雨澤愆期之州縣或恐收成稍薄
納課艱難著將雍正十三年甘肅通省所屬應徵地丁
錢糧全行蠲免俾催科不擾民力寬舒該督撫可董率
有司實力奉行以副朕加惠秦民之至意

大清世宗敬天昌運建中表正文武英明寬仁信毅大孝
至誠憲皇帝聖訓卷二十九

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷三十

積貯

雍正元年癸卯六月丁丑

上諭戶部朕去年親閱京通各倉雖有積貯但京師人民
聚集食指浩繁米糧儲備不可不裕查有漕各省惟湖
廣江西產米最廣近年歲京年歲豐收米價亦賤此三

處酌量動正項錢糧採買數十萬石僱募民船運送京師大有裨益著怡親王隆科多會同詳議具奏

雍正二年甲辰閏四月丁丑

上諭直省總督巡撫等社倉之設原以備荒歉不時之需用意良厚然往往行之不善致滋煩擾官民俱受其累朕意以為奉行之道宜緩不宜急宜勸諭百姓聽其自為之而不當以官法繩之也近聞各省漸行社倉之法貯蓄於豐年取資於儉歲俾民食有賴而荒歉無憂朕

心深為嘉悅但因地制宜須從民便是在有司善為倡導於前留心稽核於後使地方有社倉之益而無社倉之害此則爾督撫所當加意體察者也

雍正三年乙巳七月癸亥

上諭戶部歸化城土默特地方年來五穀豐登米價甚賤查黃河自陝西黃甫川界入口河之兩岸一屬山西一屬陝西應自歸化城購買米石從黃甫川界黃河運至內地到土拉庫處修建倉廩收貯其歸化城大青山黃

河岸口亦建一倉買米存貯以便由黃甫川界運至土
拉庫處再修造船隻運至陝西潼關地方其修倉修船
往來挽運所費錢糧諒亦無多刑部員外郎覺羅明壽
係朕深知之人再著理藩院遴選謹慎篤實賢能司官
一員同伊馳驛速往會同山西巡撫伊都立歸化城都
統丹晉等將查倉修船挽運水手及需用等項詳議具
奏若此事易辦則外而蒙古內而百姓大有裨益

八月丙寅

上諭戶部侍郎蔣廷錫內務府總管來保今年六七月間
京師雨水較多聞京城八倉內頗有積水停滯支領甲
米車輛來往甚艱其城外萬安倉附近城垣城上瀉水
流下倉內道路亦復泥濘如何令各倉積水通洩低窪
處加土修墊俾收放糧米之所高燥潔淨既便於車輛
行走亦不致米糧狼籍又各倉厰底或應鋪墊石灰或
應支架平板爾等至各倉詳悉查看具奏

辛卯

上諭大學士九卿等前於天津蓋造倉廩原備截留漕米
是以朕諭托時等將湖北湖南之米截留二十萬石存
貯天津托時因奏天津倉廩地勢卑濕廩底須鋪墊乾
草以隔潮氣昨牛鈕奏稱墊草亦不免浥爛如此則截
留漕米無益前所降諭旨截留之米可仍令抵通歸倉
當時蓋造倉廩原係李維鈞及地方官員經手乃並不
相度高燥之地草率營建著托時前往天津會同莽鵠
立柯喬年詳審地形或另擇高阜之處或將舊基培墊

交與李維鈞親同當時經手之員賠補修造即著莽鵠
立柯喬年監督工程至於直隸州縣倉穀李維鈞曾奏
虧空無多今歲秋收即可全補無缺今蔡珽奏稱清苑
倉穀並無顆粒清苑為保定附郭之縣倉穀尚虧空如
此則他處可知李維鈞前此所奏不實著大學士會同
刑部問明具奏又蔡珽奏稱目下省城米價騰貴請令
臬司浦文焯攜帶腳價親至天津將截留漕米星速運
三萬石以二萬石直至省城平糶以一萬石量留沿途

被水之處以濟急等語畿輔之地百姓艱食朕心深為軫念著托時到天津將漕米撥三萬石交與浦文焯作速運去今歲近京一帶雨水較多恐此米尚不敷用再令陳守創將通倉變色米六成以上者撥十萬石交與余甸蔡起俊動用脚價運至天津或平糶或賑濟應運何處俱聽蔡珽調度朕念直隸地方低窪之處衆水積而不洩以致有水之害而無水之利疏通之道不可不講已諭朱軾張燦經理此事聞陝西潼商道王全臣在

陝挑濬秦渠熟習水利著王全臣來京其潼商道員缺著松茂道孟以恂調補

九月丁巳

上諭大學士等古者視歲之上中為儲蓄之節蓋官民經畫久遠不為一時苟且之計積之於豐年用之於歉歲所謂有備無患法良而意美也朕自臨御以來宵旰勤求無刻不以民依為念乃重農積粟之詔屢下而閭閻卒少蓋藏官倉亦多虧缺即如直隸保定等府去歲頗

稱有秋今春二麥亦熟乃以夏秋雨水過多田禾被澇而民間遂有饑色若非多方賑恤窮民必至失所此皆草野無知食不以時用不以禮但快目前之有餘罔計異日之不足一朝旱澇追悔無從至於常平義倉原為備荒而設乃有司奉行不力多至缺額罪何可逭茲據江南浙江江西湖廣福建河南山西陝西廣東廣西雲南貴州等省督撫報稱今歲秋成八九十分不等朕覽奏不勝慰悅又重為吾民計及長久宜乘此時講求儲

蓄之道以備將來該督撫等可轉飭有司遍行曉諭務須撙節愛惜各留餘地預為他時緩急之需社倉之法亦宜趁此豐年努力行之勿但視為虛文故事朕為吾民籌畫養贍之道惓惓於懷無時或釋而吾民自謀其身家若但苟且因循不復長顧遠慮則重負朕軫念元元之意矣至於州縣倉儲向有虧缺者若不趁此豐收之時速行買補將來發覺斷不姑貸慎之慎之

十二月戊寅

上諭戶部湖廣為產米之鄉穀石最宜多貯將來運往別省皆為近便今查湖廣通省存倉之穀只數十萬石為數無多今歲湖廣收成豐稔著即行文該省督撫令其動支庫銀十餘萬兩遴委賢員採買穀石於省倉及府州縣應貯之處加謹收貯此時只宜陸續辦理不可因有官價一時採買致令穀價騰貴設若民間穀價稍昂即便停止俟明年再行採買江南浙江今歲俱獲豐收著各該撫就近商酌若亦可動項採買穀石著即一面

定數奏聞一面採買

戊子

上諭大學士等積貯倉穀關係民生最為緊要朕屢降諭旨令該督撫嚴飭州縣及時買補昔年虧空之數無如苟且遲延奉行不力即如原任直隸總督李維鈞曾奏稱各屬倉穀已補足七八分及今冬發倉賑濟虧空甚多若非截留漕米並發給通倉之米窮民幾至失所矣昨據月選官陳堯復條奏虧空倉穀請支動正項買補

一面嚴追本官還項朕已交與九卿議行今直省地方俱著定限三年將一應倉穀務期買補完足不得顆粒虧欠三年之後朕必特差官員前往盤查如有缺項定行重治其罪儻有不能補足情由著該督撫題奏凡虧空錢糧猶可勒限追完無損國帑若虧空倉穀則一時旱澇無備事關民瘼是虧空倉穀之罪較虧空錢糧為甚自宜嚴加處分並著內閣九卿確議定例具奏

己丑

上諭陝西總督巡撫等西安地方緊要又有滿洲駐防兵
丁省倉米石應當多貯查西安現在所貯米石為數無
多今歲秦省收成豐稔著總督岳鍾琪巡撫圖理琛就
近商酌動用庫銀採買米石存貯省倉以為備用其米
數多寡該督撫酌定奏聞務須陸續採買勿令價值騰
貴儻倉廩不足亦令該督撫酌議收貯之法該督撫等
宜仰體朕心實力奉行

雍正四年丙午正月乙巳

上諭戶部據兩淮巡鹽御史噶爾泰奏稱衆商感戴賑恤
蠲免之恩今鹽課豐裕商業已隆情願公捐銀二十四
萬兩備交運庫又噶爾泰名下有應得銀八萬兩亦願
報部撥解等語從前兩淮鹽課虧欠甚多自噶爾泰辦
理以來歷年商欠正項贏餘俱一一完納恤商裕課鹽
政肅清甚屬可嘉朕前曾諭令江南督撫酌議積穀備
用今衆商公捐及噶爾泰奏請解部之項共計三十二
萬兩著將二萬兩賞給噶爾泰其三十萬兩可即為江

南買貯米穀蓋造倉廩之用所蓋倉廩賜名鹽義倉即著噶爾泰交與商人經理如此則於地方積貯甚為有益而衆商急公之項亦得實濟

九月甲辰

上諭戶部去年山東濟南兗州東昌三府偶有水患朕心軫恤蠲賑兼施復將本年漕米或全緩徵或緩徵一半以紓民力今年山東雨水調勻二麥豐登民生樂業惟是去歲被水低窪之處又經今夏之雨未必能及時播

種以獲全收查去歲緩徵漕米應於今年並徵誠恐民
力艱於輸將用是再沛恩澤將去年全緩之州縣令其
於今年帶徵一半明年帶徵一半務使民力寬餘以副
朕加惠閭閻之意又聞山東登萊青三府連年豐稔此
時商販之來自東而西者絡繹不絕著山東巡撫酌量
動用帑銀委官購買分貯於濟南等屬米少之州縣再
勸諭各商販等多運米石至濟南三府俾民間得以收
買存貯則明歲青黃不接之時米價不至騰貴實預籌

足民之善策也

十二月丁卯

上諭戶部今歲江南秋雨稍多其江安所屬被水州縣已
令該督撫轉飭有司確查賑恤務使小民得所但聞入
冬以後時有陰雨積水未消春麥未能及時耕種恐交
春米價漸昂而青黃不接之時更須預為籌及況蘇松
戶口繁多民間食米多取給於外販尤當早為留意查
江安糧道有存貯還漕一項約計二萬八千餘石安慶

廬州鳳陽淮安四府各有分貯留漕之項共計九萬餘石此米原為地方備用而設迄今年月已久未必實貯在倉應差京官一員前往確查並會同江南督撫作何分別留運平糶之法以濟民食但江南地廣人稠需米之處此數未必敷用必設法多貯方覺寬裕其應作何採買運送備用之處著九卿速議具奏

雍正五年丁未正月乙巳

上諭戶部兩淮巡鹽御史噶爾泰奏稱乙巳綱商人呈稱

感戴皇恩撫恤鹽豐課裕家足戶盈情願公捐銀二十四萬兩以充公用以達微忱等語朕軫恤衆商是以減除浮費加添鹽斤種種施恩之處無非欲使衆商均沾利益資本饒裕並不計其感激報効也伊等上年公捐銀兩朕因其既已捐出難於退還故令即於本地方建立鹽義倉以裕積貯備地方之用今伊等又復公捐大非朕意但據噶爾泰所奏衆商情詞懇切著將此項銀兩令衆商各暫行存貯將來遇有公事動用之處再候

諭旨或將此項任伊等資生利息亦從其便向後不必再捐又據噶爾泰奏稱衆商備伊公務銀八萬兩今一併交庫等語此係噶爾泰應得之項若有需用之處聽其自行支用伊若不接受任其退還衆商朕不收受聞得煎鹽竈戶皆居住濱海之地離城最遠一遇歛收之歲覓食維艱若遠赴鹽義倉領取米石恐窮民多往返之勞朕意應計地之遠近人之多寡酌立數倉於近竈之地積貯米穀以備貧苦竈戶一時緩急之用令誠實

商人經管其事若遇歉歲即以此為賑貸之資濟其困乏著噶爾泰悉心經理即於乙巳綱商人公捐銀兩內酌量動用若干以為建倉積穀之費並遴選商人管理務期實有裨益

六月丙戌

上諭署湖廣總督福敏據奏虧空社倉穀石各員請分別議處社倉之設所以預積貯而備緩急朕御極以來令各省舉行曾屢頒訓諭務俾民間踴躍樂輸量力儲蓄

不可繩以官法誠以官法相繩則勉強催迫轉滋煩擾
惟期設法開導使衆樂從不致一毫擾累乃為盡善也
數年之內各省督撫奉行最力者惟湖廣總督楊宗仁
今據福敏陸續盤查具奏前來始知原報甚多而現貯
無幾此中情弊想因不肖有司侵蝕入已或那移以掩
其虧空又或楊宗仁銳於舉行而各官迎合其意虛報
穀數以少為多均未可定總之舉行社倉之法其中實
有甚難者我

聖祖仁皇帝深知其難是以李光地奏請而未允張伯行暫行而即罷此實事勢使然也以民間積貯言之在富饒之家自有蓄積雖遇歉收而無藉乎倉穀則當輸納之時往往退縮不前至貧乏之家仰給社倉固為殷切而每歲所收僅供生計又無餘粟可納以備緩急此責諸民者之難也至於州縣官實心視百姓為一體者豈可多得今以常平之穀為國家之公儲關係已身之考成尚且侵欺那用虧空累累况民間之社倉安能望其

盡心經理使之實貯以濟用乎朕之舉行社倉實因民生起見又諸臣條奏多言之鑿鑿是以令各省酌量試行以觀其成效何如並非責令一槩施行也湖廣社倉虧空之數即交與福敏悉心清查儻穀已如數交倉而州縣侵蝕那移忍以百姓預備之需充一己之私用者著即於原侵那之州縣名下嚴追賠補或民間原未交倉或交倉之數與原報之數多寡不符者若必欲令民間照數完納恐小民力有未敷未免竭蹶非朕曲體民

隱之意福敏辦理此事必須至公至當方於吏治民生
兩有裨益也自古有治人無治法必有忠信樂善之良
民方可以主社倉之出入必有清廉愛民之良吏方可
以任社倉之稽查各省官民果能實力奉行而善全無
弊朕實嘉之至於繩以官法而好尚虛名則有司奉行
之不善負朕本意矣

辛卯

上諭內閣常平倉穀乃民命所關數年以來朕為此事宵

吁焦勞諄諄訓誡若地方大小官員苟有人心斷不忍
置之膜外查福建通省應貯米穀共一百七十八萬石
為數可謂足矣乃上年稍覺歉收米價畧長而地方大
小官員與兵民之心皇皇以缺米為慮彼時朕即疑閩
省積貯之數必有虧空故地方情形若此也近聞閩省
各屬倉穀錢糧虛懸者甚多有銀穀兩空者有無穀而
僅存價值者至於實貯在倉者則十無三四毛文銓身
為巡撫奉朕面訓切諭乃將無作有捏稱實貯在倉敢

於欺罔且忍以百姓性命之所需供屬員之侵那作弊
負國負恩莫此為甚向來直隸江西二省倉儲不實經
朕特遣大臣前往逐一清查並遴選人員命往將虧空
之州縣官即行更換是以二省倉穀漸次清楚今閩省
積弊若此亦當特遣大臣會同新任巡撫常賚將通省
倉穀秉公據實一一清查其揀選府州縣等官著即帶
往并前所發人員遵照諭旨分別題補委署如有查出
虧空之州縣並失察之知府等官即將伊等解任審追

其員缺將前後命往人員應題補者題補應委署者委署務期徹底澄清不使絲毫朦混以副朕察吏惠民之至意

癸巳

上諭內閣倉場米石乃國家第一要務試思此項米石民間輸納何等辛苦官員徵解何等煩勞糧艘運送京師何等繁難一顆一粒皆當愛惜不忍輕忽朕為此時加訓飭曾降旨令修理倉廩不惜多費帑金務期完固托

時陳守創身為倉場侍郎自當仰體朕心悉心料理昨朕特遣大臣等前往查看京通各處倉廩屋瓦滲漏牆壁損壞者十居八九所貯米石漸至潮濕霉爛夫以如珠如玉之米糧而視為泥沙棄擲忍心害理莫此為甚若不嚴行稽察無以儆怠忽而清弊端在京十倉每倉派都統或副都統各一員御史中不論滿漢每倉各派一員專任稽察之責所有米石出入支放奏銷事件仍屬倉場侍郎管理其房屋滲漏牆垣損壞與倉內鋪墊

及匪類偷竊一切情弊俱交與派出之都統副都統御史稽察遇有查出之處即行知倉場侍郎若倉場侍郎等不卽辦理妥協敢致遲延著都統副都統御史奏聞儻有應行查出之處不行查出將缺少米石著落倉場監督等官與派出之都統副都統御史分賠其通州三倉交與通永道通州副將稽察亦照依京倉例行

雍正六年戊申四月庚寅

上諭內閣積貯米穀所以備旱澇緩急之需民命攸關最

為切要朕無時不加訓飭嚴其考成務期地方有司實力奉行庶可有備無患又念倉廩若不堅固必有霉爛虧折等弊是以雍正四年諭令各省加意修理但恐有司視為具文奉行不力且新舊官未定倉廩交代之例或去任之員以損壞滲漏之廩座任意交代貽累於後官或接任之員有霉爛虧空等情而藉口舊日倉廩之不修委咎於前任似此種種弊端皆於積貯之政大有關係嗣後著將各府州縣倉廩入於交盤項內新舊交

金匱要略卷三十一
代若有傾圯滲漏之處著接任官即行揭報儻有徇情
濫受者即係接任官之責除照例處分外仍令賠修如
此則有司各顧考成於積穀養民之道實有裨益其如
何定例之處著九卿會議具奏

雍正七年己酉六月己亥

上諭戶部據陝西總督岳鍾琪奏陝屬設立社倉事宜請
特頒諭旨恭錄鐫石又謹擬社倉條約亦請刊刻木榜
以昭程式等語朕惟國家建立社倉原令民間自行積

貯以百姓之資糧濟百姓之緩急其春貸秋償及滋生
羨息各社自為經管登記地方有司但有稽查之責不
得侵其出納之權此社倉之古法也是以各省有請立
社倉者朕皆令其聽從民便毋得強勒捐輸繩以官法
以致便民之舉轉為民累所以曉諭各省督撫者不啻
至再至三矣從前岳鍾琪在京時請於通省加二火耗
內應行裁減每兩五分之數且暫行徵收發於民間採
買穀石分貯社倉俟採買數足即行裁減是於暫收耗

羨之中隱寓勸輸之法實則應行酌減之耗羨即小民
切已之資財而代民買貯之倉糧即小民自捐之積貯
此藏富於民之良法最為切實而易行是以俞允所請
令其辦理乃陝省官員不知此項穀石本係民資又未
識從前岳鍾琪奏請之由以為收貯在官即是公物不
肯付民經管而胥吏司其出納者遂有勒買勒借之弊
殊非數年以來朕之周咨詳畫多方生養斯民本意矣
今特降諭旨將朕允從岳鍾琪之請並岳鍾琪陳奏原

委明白曉示著署督查郎阿巡撫武格刊石頒布俾各
州縣鄉社小民咸知朝廷經營設法之蓋藏實百姓自
為歛散之資用儻地方官有於社倉穀石創議交官不
交百姓或指稱原係公項預為公事侵那之地者俱以
擾撓國政貽誤民生論從重治罪其岳鍾琪所擬社倉
條約著戶部抄錄交與該督撫分發各州縣刊刻木榜
於各鄉社倉豎立以為永久程式

閏七月戊戌

上諭戶部各州縣之設立常平倉積貯米穀原以備地方
一時緩急之需所關甚重朕為此備極焦勞多方籌畫
務期倉儲有備旱潦無虞年來所頒諭旨亦深切著明
矣夫收貯米穀必須倉廩堅固始可為經久之計是以
從前降旨將倉廩完整與否一併入於交盤之內以為
州縣官考成今聞各省中偏僻之邑竟有向來本無倉
廩而有司苟且因循不行詳請督撫藩司等亦漫不查
察致將養民備荒之具或寄頓於寺廟或借放於紳士

富戶之家而霉爛虧折生事滋擾之弊多由此起大非
朕慎重民儲之意凡各省未有倉廩之州縣著督撫詳
悉查明即行商酌建造

九月辛丑

上諭戶部據奉天將軍多索禮奏稱今歲盛京秋成大稔
禾稼瓜果等項俱獲豐收米糧價賤朕思米穀者乃

上天恩賜以養育萬民者也若人人存心敬受

天賜隨時撙節常留有餘崇儉去奢謹身節用則

天心必垂默佑雨暘時若俾常享盈寧之福若暴殄天物輕棄五穀不思稼穡之可寶罔念農事之艱難則必上干

天怒而水旱災祲之事皆所不免此從來天道人事之斷然不爽者奉天地方百穀順成已八年於茲矣今歲收成又慶豐稔穀價之賤自昔罕聞朕心深為慰悅感戴上天賜佑之恩則本地官民人等宜敬謹愛惜以仰承

天貺向來奉天居民有以米穀飼養豚豕之陋習此即暴

殄天物之一端已令地方官勸諭禁止今不可因米穀
饒餘復蹈前轍積貯乃王政之要圖民生之切務奉天
地氣乾燥不比南方潮濕之區正當乘此豐收之時以
為儲蓄之計著該地方官員通行曉諭勸導所屬民人
若有穀之家果能留心積貯至於穀多價賤難於出糶
者著大臣官員等即行奏聞朕當發官價糴買或從海
道運至京師俾積穀之家實獲利益必不使有穀賤傷
農之歎也

十一月乙未

上諭署川陝總督查郎阿安西屯墾地畝今年人力既勤
天時復稔各種糧穀俱獲豐收朕心深為慰慶今據奏
禁止姦徒興販射利辦理甚是惟是飭令民戶多餘之
穀只許在本處糶賣尚未妥協朕思民戶盈餘之穀原
期糶價以為日用之資若本地糶穀者少則出糶未免
艱難不可不為計及著該地方官酌量本地情形不必
相強若有將盈餘之穀情願出糶者著動支官銀照時

價糴買存貯公所明年儻有需用之處聽辦理軍餉之
大臣及該督撫行文支撥安西現有備用銀兩即可動
用採買再於西安藩庫撥補還項此朕體恤民戶俾糴
穀得價用度豐裕之至意著地方官善於奉行不可勒
令糴賣生事滋擾

雍正八年庚戌正月戊寅

上諭內閣雍正六年內湖南布政使趙城摺奏湖南現貯
倉穀共計六十餘萬石之多又有收捐穀石本省可云

有備但楚南地勢卑濕積貯既久不無霉爛之虞請分撥別省令其來楚運往以免霉變等語朕將此摺發與戶部議奏經戶部議稱應行文江浙督撫令其詳酌如有應需穀石之處即委員往楚轉運朕降旨俞允隨據兩淮巡鹽御史噶爾泰摺奏據兩淮商人黃光德等具呈情願出資將湖南積穀三十餘萬石照依原買之價交納湖南藩庫領運隨地隨時售賣仍將所售價銀交納運庫等語隨經王國棟題明將雍正三年動帑所買

穀一十六萬二千餘石照原價每石三錢四分九釐給商交價運售此湖南巡撫布政使及兩淮巡鹽御史前後具摺辦理之案也今據湖廣總督邁柱奏稱今年湖南岳常二府之臨湘武陵等十州縣微欠雨澤臣等豫為綢繆動用公項銀一萬兩買米備糶而貯倉之現穀與其照原價以給商不若留俟來年春夏照原價平糶以濟本地之民食似應飭商暫停領賣俟明年無需用之處仍聽該商領運等語朕思向因湖南撫藩皆言地

方積穀甚多難以久貯奏請分撥別省運售以免霉變是以兩淮商人有赴楚領運効力急公之請令商人既已交價而邁柱又稱楚南需米備糶應請飭商暫停領賣是湖廣督撫藩司前後自相矛盾也湖南現貯穀六十餘萬石之多欲分撥別省以免霉變則本省府縣有需米之處正可將此奏聞平糶以濟民食而邁柱乃云正在動用公項銀一萬兩買米備糶是邁柱之奏又自相矛盾也且邁柱又稱此時飭商停運俟楚省不需米

穀之時仍聽該商領運等語是米貴之時則令商人停運而米賤之時則令商人領賣亦甚非情理之平朕意此米穀中必有虧空情弊至於噶爾泰既代商人具奏而又不為伊等行催楚省歸結其事亦屬不合查從前噶爾泰代衆商具奏領運之時原有隨時隨地售賣之語今江浙俱獲豐收米價甚賤湖南既有需米之州縣著該商仍照前議領米即於湖南需米之處照時價糶賣不許地方官抑勒商人亦不許商人高擡價值儻商

人獲有餘利聽其自取不許交官如此則淮商領米得以貿易而楚省積穀仍得流通於商民均有裨益湖廣督撫等即遵諭行

已亥

上諭八旗都統等數年來荷蒙

天眷米價甚賤爾等八旗米局係將兵丁所關之米發賣若米價甚賤不能賣完則積貯日久米色易變朕以為此等米石宜俟下季發米之時視各佐領下兵丁分內

應領之米將局內米照數給發即行文倉場衙門照數坐扣則兵丁既可就近得米而局內積貯之米亦不致變色糜爛矣

十二月丁巳

上諭戶部今歲山東被水之州縣朕心軫念殷切已令地方有司加意撫綏又特遣大臣等按戶查賑並給以修葺室廬之資其成災州縣之地丁錢糧及漕糧並行豁免欲使閭閻厚霑恩澤咸登衽席也頃又思該省既有

被災之州縣則本地所產之米較少於平時其不成災
州縣應有交官漕糧若此時仍照舊徵收則米穀之存
於民間者較少且恐因此而致穀價稍昂未免輸將竭
蹙但查漕糧向無豁免之例今年之暫免徵收者出於
朕之特恩至不成災之州縣尤難越格蠲除今再四思
維著將東省不成災之州縣今歲應徵之漕糧停其徵
收俾民間多留穀石則民力自覺寬餘俟明歲收成之
後令百姓照數交官此項亦不必運送京師即存貯本

省補完今歲散賑之倉穀如此庶於地方大有裨益著
即遵諭行

雍正九年辛亥二月乙未

上諭內閣山東濟南兗州東昌三府從前積穀甚多因去年水災之後朕特命大臣動發倉糧賑濟用穀一百八十餘萬石又念今春二三月間青黃不接小民粒食維艱再發倉穀二十萬石截留漕米二十萬石重賑兩月是三府各州縣存倉穀石俱作賑濟之用雖登萊青三

府尚有存倉之穀百餘萬石而轉運甚難與濟兗東三府無益況天時不可預必自宜早為籌畫積貯之計查去歲直隸收成頗豐目今米價亦平或從直隸採買米石令回空糧船運至東省或將南漕截留數十萬石分貯水次州縣爾等詳悉查議再德州現有駐防兵丁應否於德州照天津建倉之例起建倉廩以備每年截留存貯儻河南山東有需用米石之時則一水可通似屬有益爾等一并確議具奏

雍正十一年癸丑十月壬戌

上諭內閣浙江杭嘉湖三府上年偶被水災兼以飛蝗傷稼朕特沛恩施將應完漕米分年帶徵發帑賑恤黎民不致失所惟是本地所產米石不敷食用現今年歲雖獲豐收而上年借糶倉穀恐一時未能買補足數明歲青黃不接時尚須米石酌撥平糶以濟民食不可不預為籌備著將杭嘉二府屬本年額徵漕米各截留五萬石存貯備用再湖州府之歸安烏程二縣今歲收成稍

歉所產米糧尤應留為本地之用著將兩縣本年分應
徵漕米一十八萬餘石並帶徵雍正十年分漕米七千
餘石一併照部定折價改徵銀兩解部著該督嚴飭地
方官實力奉行無得縱役需索以仰副朕加惠黎民至

意

欽此

大清世宗敬天昌運建中表正文武英明寬仁信毅大孝
至誠憲皇帝聖訓卷三十

欽定四庫全書

史部

世宗憲皇帝聖訓卷三十一
四

臣 永瑤 恭 校

編 修 臣 裴 謙 覆 勘

總校官原任中允 臣 王 燕 緒

校對官中書 臣 王 璣

謄錄監生 臣 藍 嘉 璐

欽定四庫全書

大清世宗敬天昌運建中表正文武英明寬仁信毅大孝
至誠憲皇帝聖訓卷三十一

謹制度

康熙六十一年壬寅十二月癸亥

上諭九卿等自

皇考升遐以來朕心哀慕無已一應典禮俱詳考舊章務
從隆備蓋不敢以天下儉其

親也但上之所行下必效之向來八旗官員於喪葬等事每多糜費今見朕備禮如是恐習以成風競尚奢侈而兵民等或至傾家蕩產殊非朕以禮教天下之意論語云禮與其奢也寧儉喪與其易也寧戚禮記云喪具稱家之有無載在典籍灼然昭著著九卿等將滿漢職官按其品級分為等次及兵民喪葬務從簡樸毋得僭妄并將婚嫁等禮詳議定例著為令

雍正元年癸卯二月丙寅

上諭都察院各衙門募設書辦不過令其繕寫文書收貯檔案但書辦五年方滿為日既久熟於作弊甚至已經考滿復改換姓名竄入別部姦弊叢生更有一等缺主名色掌握一司之事盤踞其中交通賄賂上下朋姦書辦尚有更換缺主總無改移子孫世業遂成積蠹自後書辦五年考滿之後各部院堂司官查明勒令回籍聽選如有逗遛不歸者飭令五城司坊官稽察遣逐其缺主倚恃勢力抗違潛匿者刻即叅究押解回籍各部院

金史卷三十一
一年一次保結具奏儻仍有潛居京師者或經朕聞知
或被科道題叅將出結之大臣官員一併治罪

三月乙酉

上諭部院各衙門凡一應衙門卷案各有典守之官稽查
引據全以舊檔為憑此固一代之典冊六官之掌故不
得視為具文也收貯卷案封禁雖嚴而翻閱查對不能
脫書吏之手盜取文移改易字跡百弊叢生莫可究詰
嗣後司官遷轉將所掌卷案新舊交盤各具甘結說堂

存案如有疎失換易等弊一經發覺與受同罪爾各部院衙門急宜查核清楚設法封貯永杜弊端不得因卷案浩繁畏難退沮其交盤事例爾部院諸臣公同確議具奏

五月甲申

上諭八旗大臣步軍統領及都察院大小官員有一定之品級即有一定之服式所以重名器辨等威也近多不按品級佩帶數珠且馬項懸纓前用導馬更有將紬為

坐具者尤屬僭越嗣後應各按品級遵奉定例而行爾等嚴加稽查有仍前僭越即行叅處大臣官員亦無得徇情隱庇再舊例諸王等以數珠鞍轡賞其屬下許令服用今後著將賞用之處行文該旗存案年終彙奏以便稽查

七月癸巳

上諭內閣下五旗諸王將所屬旗分佐領下人挑取一切差役遇有過失輒行鎖禁籍沒家產任意擾累殊屬違

例嗣後仍照舊例旗分人員止許用為護衛散騎郎典儀親軍校親軍或諸王挑取隨侍之人或欲令所屬人內在部院衙門及旗下行走者兼管家務或需用多人以供差役或補用王府官職或令隨侍子姪著列名請旨將奉旨之處知會該旗都統等令都統等覆奏其旗分人員不許擅行治罪必奏聞交部儻有仍將旗分人員妄行擾累令其多供差役兼管散職著該都統等奏聞若都統等隱匿瞻徇一經御史叅劾即將該都統等

治罪

雍正三年乙巳三月癸丑

上諭各省督撫等周禮稱惟王建國體國經野孟子亦言
仁政必自經界始經界所關誠為至重從來兩省交壤
之地其界址多有不清雲貴川廣等處為尤甚間有一
省之內各州縣地界亦有不清者每遇命盜等事則互
相推諉礦廠鹽茶等有利之事則互相爭競甚非息事
寧民之意各省督撫其共矢公心詳細清查如與鄰省

地界有不清者則兩省各委賢員公同勘定若本省內地界有不清者即委本省賢員勘定地皆朕土人皆朕臣此盈彼絀悉在版圖之內無容分視也雖地界或間有難定之處但平心勘畫即使稍有不協然一定之後久遠得以遵據永無推諉爭競之處於地方大有裨益矣

六月己卯

上諭八旗都統等國家設立法制特欲使衆人遵行也若

定制之內及條奏准行事件有不便施行者諸臣可將不便施行之故聲明具奏朕即諭令停止若既傳示衆人令其遵循事件必須實力奉行方為有益儻仍照常踈忽則與未嘗傳諭於衆者何異如白塔及九門例有信礮轟幟乃曉示士卒之標準也今不惟兵丁等不知此例即新任大臣亦有不知者大臣等俱係管轄兵丁之人儻值用兵爾等即為士卒之觀瞻職任甚屬要密不可妄意輕視爾等各旗俱給有開載號令之書一冊

作何曉示新舊兵丁咸令知悉凡事務須防於未然周
思詳慮不少忽畧則自無可虞之事至於軍器為用最
要聞得兵丁等佩刀俱係粗鐵竝無鋒刃尚可謂之軍
器乎且東華門西華門外間有賃刀之處步軍統領衙
門應將此查明禁止爾等公同詳議具奏

雍正四年丙午三月甲寅

上諭九卿漢人為外官者俱迴避本省朕思漢軍之在直
隸亦當如漢人之迴避本省也直隸去京城甚近漢軍

中親戚朋友散處直隸州縣且伊等莊田地土亦多分隸其地保無請託牽制徇私報怨之弊乎嗣後應照漢人迴避本省之例停其在直隸居官令於別省各缺銓用著九卿速議具奏

四月乙亥

上諭內閣督撫提鎮俱係朝廷簡用之大臣其因公晉接自有一定之禮儀不應過卑過亢以違制度乃間有督撫倨傲妄行而提鎮等遂卑躬屈節以為諂媚者如年

羹堯當日視提鎮等如同奴隸每令其披執進見常驚
在江南時令兩司侍立於旁此皆妄誕不法之甚嗣後
督撫提鎮相見務遵會典所載一定儀注儻有違例披
執者一經發覺定將倨傲諂媚之人一同治罪又屬員
謁見上司遇應穿公服之日只用補服不許擅用朝服
向日屢申明禁近來仍有違背不遵者今曉諭後若再
有此等察出必加重處

八月辛酉

上諭八旗大臣等侍郎一官係辦理部務大臣職任與副都統相等嗣後按班坐立之處俱令在滿洲副都統之次蒙古漢軍副都統之上

九月甲寅

上諭內閣向來邊省要缺題請調補乃督撫提鎮拔用私員之捷徑其中多有委用非人且有題補後並未身履其地而因邊俸遂得速陞者是以

聖祖仁皇帝曾下特旨以督撫提鎮題補太多此習相沿

日久大有關係著九卿議奏經九卿以停止題補議准
遵行在案朕思邊省地方或烟瘴難居或苗蠻頑桀官
斯土者與內地不同是以邊俸較腹俸之陞遷為速耳
今太平日久亦有烟瘴漸消風俗漸淳之處仍照舊例
題補陞轉亦覺太濫著九卿將各邊俸之缺或係瘴癘
未除宜令督撫等題補或係風氣已轉可照內地選用
一一分晰議奏至文武原屬一例武職官員亦應照文
官遷轉之例以邊俸較俸為宜著一併議奏

雍正五年丁未九月戊辰

上諭吏部聖人之道為人臣者過闕必趨而於家庭父母之前亦有趨庭之禮蓋因敬謹之念素存於中故舉動威儀之間自無怠忽也前者大朝之時有漢司官二人於班聯之中大失禮節朕降嚴旨欲重治二人之罪嗣後衆人皆知儆惕因而寬釋至於引見之時往往漢官有在朕前高視濶步舉動不恭者又聞各部堂司官辦理公事滿司見滿堂則屈一膝應對而漢司之對堂官

則或立或蹲一任其意同一堂司何以滿漢之禮互異
即科道滿漢禮節亦不相同况漢司官陞遷方為道府
道府之見督撫卑躬屈節竟有違例朝服跪道以為恭
敬惟恐以簡畧獲罪者夫督撫品級既不及部院堂官
而司官品級則又卑於道府何以為京官則傲慢不恭
而為外吏則謙抑過度是伊等不知爵位之尊卑而但
論權勢之輕重也司官不敬堂官相沿日久平日不知
禮儀是以至朕前亦不能約束身心每至草率不恭如

昨日御史韓瑛於朕御門時捧持本章竟不恭敬高舉
今已被叅現在部議又如原任侍郎陳守創年羹堯曾
奏其粗率無禮一日在諸王大臣會議之處曳衣露足
見者無不哂笑從來滿洲風俗尊君親上出乎至誠事
事不敢越禮而漢人不知倣倣何也朕以誨人不倦為
心有一見聞即明白指示欲其醒悟悛改不忍聽其暗
昧終身大凡為司官而不敬堂官者其人必無上進之
志滿漢司官之禮自應畫一如何酌定著九卿會議具

奏

十二月癸巳

上諭八旗大臣等旗員以習武為要即文職亦不可廢若將弟兄子姪帶赴外任家口既多如何能為廉吏而子弟但知倚仗勢力無所不為擾害百姓最為惡習漢軍內不得人才皆由於此也年幼者隨任猶可十八歲以上理應留京令其披甲學習馬步弓箭與國家出力如可以習文者送赴官學讀書著將外省旗員帶族人赴

任所之處永行禁止倘係親子十八歲以上欲帶赴任所者著具呈該旗大臣請旨再旗人不應作外省驛丞典史等雜職漢軍內壯丁多之佐領添編佐領或在直隸綠旗營當兵俱著會同吏兵二部定議

雍正六年戊申八月庚辰福建巡撫朱綱奏部頒
藉田儀注應建東郊但閩省州縣地勢不同難於
畫一

上諭內閣禮部所議藉田儀注引禮記天子耕於南郊諸

侯耕於東郊之文是以將各省耜田議於東郊建置此
禮部識見拘泥之處夫建立耜田必在郡邑近城之地而
各郡各邑地勢不同其城東一面或依山嶺或近河渠未
必俱係平壤即無山水阻隔亦未必俱係潔淨豐腴之區
安得以諸侯東郊為比而令地方有司難於辦理乎況已
建之壇已置之田又令遷移他所不但耗費更張亦大
非敬謹虔誠之道閩省已設壇田不必更動其各省與
此相類者著將此諭旨通行各巡撫曉諭所屬知之

雍正七年己酉十一月丙戌

上諭內閣私販硝磺禁約甚嚴聞湖廣永順之耶里等處與川省連界地方素產焰硝土人以煎熬為業外省小販多以布鹽雜物零星換易運至梅樹地方分發而私販者即於此處僱船裝載分往各處發賣以致附近之苗人得以偷買私製火藥此皆州縣有司疎忽怠玩之故著四川湖廣該督撫等轉飭該地方官嚴行查禁儻有犯者按律治罪若地方官仍玩忽疎縱著即題叅議

處

十二月壬寅

上諭內閣百官章服皆有一定之制所以辨等威昭品秩也近來服色頂帶及坐褥頂馬胸纓之屬每有不按定例任意僭越者御史有稽查部院之責而各御史中即有叅差不齊之處是已身先有過分違禮之咎又何以彈劾他人嗣後紫禁城內著派三旗侍衛稽查大城內著步軍統領稽查外城著五城御史稽查儻有違例僭

金史紀事本末 卷三十一
越之人該侍衛提督御史不行叅奏別經發覺者將稽
查之員一併處分

雍正八年庚戌二月乙巳

上諭直省督撫提鎮等兵民各有職業是以分隸文武管
轄不使混雜難於約束致生事端聞得廣東瓊州遠隔
海外其弁員等竟於額設兵丁之外另有掛名兵丁乃
係無賴之徒千把等員利其餽送即准附名投充而此
輩居然以營兵自居不服地方官拘管在營弁則以原

非兵丁又無糧餉不行約束在州縣則以名列戎行非同編戶不便置問以致介在兩岐恣行不法欺壓良善聚集匪人甚為居民之累瓊州一處如此恐他處與此相類者不少著各省督撫提鎮等悉心確查嚴行禁革

乙丑

上諭內閣向來外省各標營沙唬趕繒等船原令道員會同副將監督修造道員遴委同知通判承修副將遴委營都司守備監修聞承修之員備辦物料必經監修驗

看自千把以及遊副逐層需索及如式修造赴各標營
交收又有驗看勒措之弊迨交收之後一任船隻棄置
河干雨淋日曬船中器械繩索為頭舵等人盜竊變賣
而該管將弁概不追究夫始則借端勒索後則聽其毀
棄豈非以承修之責專在文員而監修之武弁置身局
外遂至視同陌路乎此等錮弊聞各處皆然而京口將
軍標下為尤甚嗣後修造標營船隻著道員副將會同
領價道員遴委丞倅副將遴委都守協同辦理修造如

係將軍標下船隻即遴委叅領以下等官同領同辦其船隻交收之後在汛停泊責令頭舵苦蓋澆洗每歲令該管將弁出具印結送督撫查核如有陞遷事故令其具結交代至於修造船隻有小修大修拆造之不同是以工料多寡懸殊今聞船未發廠頭舵人等已將在船什物私行盜賣即屆小修亦必令其拆換添備甚屬不法嗣後著將什物一并具冊移交如有短缺將該管將弁及頭舵人等分別叅追總之各省船隻每當修造之

時及交收之後其中種種弊端難以枚舉今就朕所聞頒發諭旨在各省將軍督撫提督等悉心商酌時加訪察以除諸弊儻諭旨中有難於奉行之處亦著據實陳奏

三月辛卯

上諭內閣午門外朝房之南科房之北有碑亭一所供奉皇考聖祖仁皇帝御製臺省箴碑文理宜恭敬嚴肅洒掃潔清以昭儼恪之誠聞朝會之期各官齊集徃徃列坐

碑亭之內談笑喧譁箕踞傲慢又或書吏奴僕等抱牘出入無人禁止甚為不敬查此地與六科相近即著六科輪班撥人護守每日掃除潔淨虔謹啟閉倘官吏人等仍敢擅入視為憩息之所著輪班之科衙門即行叅奏如科員不行查叅經朕訪聞定行交部察議其碑亭建立已久如有應行修理之處著工部敬謹修理

四月己酉

上諭吏部道員有盤查錢糧審緝命盜案件之責是以州

縣有虧空遲延等事該道與司府一例處分聞四川所屬州縣刑名錢穀等事竟直詳藩臬該道並不與聞若有處分則將該道一併叅罰甚為屈抑且非設官本意著吏部行文四川巡撫令該省四道於所屬州縣每年巡歷一週如有虧空那移諱盜等事即咨牒兩司詳報巡撫確查題叅其地方詞訟該道亦得聽受審斷凡各州縣案件俱從該道申轉以專守巡之職

七月癸巳

上諭內閣聞刑部右侍郎常賚回京路過西安府該省督撫二人及副都統四人率同文武等官奏請朕安乃於齊集之處副都統陸實陳良棟等與巡撫爭論班次大失體統朕思同為滿洲大臣共事一方自應倍加和協彼此敬禮以為官弁兵民之表率況請安關係大禮而乃於大庭廣衆之前互相爭競俾遠近傳為笑談深可愧恥此番若係巡撫倡論在先朕自將巡撫議處今聞爭論之端起於副都統等則其過不在巡撫矣大約武

臣平日以文臣缺於周旋或有應付不到之處懷怨於心是以假公濟私加文臣以無禮而不顧大臣之體此風斷不可長西安副都統四人著交與總督查郎阿務將何人倡議何人附和之處一一查明無得稍為徇隱其倡議之人交部嚴加議處附和之人交部議處若查郎阿不能據實查明朕即將副都統四人俱調來京另派大臣審訊嗣後西安一應會集之處巡撫班次著在副都統之上永遠遵行該省巡撫副都統等若因此番

爭論之故文臣或有脅制武臣之意武臣或有怨怒文臣之心別尋事端暗生嫌隙經朕訪聞必究問根由將理屈之人從重治罪大凡文武不和皆起於私心蔽錮若公則未有不和者朕之訓誡至詳且悉同為國家之臣同辦國家之事不能遵朕訓旨共矢和衷祇因一念之私遂至懷挾猜疑各立門戶置國家公事於不問有是理乎嗣後各省儻再有文武不和者朕定將文武官一并調取來京嚴加究治以為人臣因私廢公者之戒

雍正十年壬子五月戊辰

上諭內閣織造本非大員而在外體統任意僭越至於司庫筆帖式官職尤卑乃以欽差為名妄自尊大與督撫拜帖稱呼俱用平行禮妄誕已極嗣後著嚴行禁止儻有以片紙隻字干謁地方官及不按品級規矩僭越妄行者定行從重治罪

七月乙酉

上諭內閣我朝設立各省駐防兵丁原以捍衛地方申明

武備其歷來所定規條俱屬盡善無可更張乃近有以
一二事瀆陳朕前者一則稱駐防兵丁子弟宜准其各
省鄉試獨不思國家設立駐防弁兵原令其持戈荷戟
備干城之選非令其攻習文墨與文人學士爭名場屋
也在弁兵之子弟有能讀書向學通曉文義者原聽其
來京應試以廣伊等進取之途竝未禁其從事文學也
若悉准其在外考試則伊等各從其便競尚虛名而輕
視武事必至騎射生疎操演怠忽將來更有何人充駐

防之用乎況我

聖祖仁皇帝臨御六十一年所以教養弁兵者至周至渥
如果應行早已著為令典又何待今日之喋喋敷陳乎
一則稱駐防兵丁身故之後其骸骨應准在外瘞葬冢
口亦應准在外居住獨不思弁兵駐防之地不過出差
之所京師乃其鄉土也本身既故之後而骸骨冢口不
歸本鄉其事可行乎若照此行之日久將見駐防之兵
皆為漢人是國家駐防之設竟為伊等入籍之由有是

理乎以上二條皆事之必不可行者著將朕旨頒布於外俾無知之人豁然醒悟不得再行妄奏

雍正十一年癸丑十月癸酉

上諭內閣督撫提鎮為封疆大吏總理軍務糧儲刑名錢穀營伍汛防等事責任甚重是以簡命之初頒給坐名敕書將所管轄地方所節制官員竝應行事宜備細開載令其詳酌施行而督撫提鎮等於奉到之日即謄黃刊刻通行所屬各為遵守此定例也但國家承平百年

因革損益備極周詳各省州縣衛所有原隸該省後經改隸鄰省者有鄰省所屬原聽本省兼轄今已無須兼理者有文武官弁原係本職後經另改職銜者有地方改設已久員缺裁汰多年者而敕書所載祇照舊式繕謄竝未另行改定是竟視為具文矣其何所遵守嗣後頒給敕書該衙門務將督撫提鎮等現在管轄之地方節制之官弁與任內一切應行事宜逐細查明詳確開載俾節制經理釐然可據庶不失慎重封疆以昭職守

之至意

十二月戊午

上諭內閣從前廣東巡撫鄂彌達條奏臺灣地方僻處海中向無城池宜建築城垣礮臺以資保障經大學士等議令福建督撫妥議具奏今據郝玉麟等奏稱臺灣建城工費浩繁請於現定城基之外買備茨竹栽植數層根深蟠結可資捍禦再於茨竹園內造建城垣工作亦易興舉等語郝玉麟不過慮其地濱大海土踈沙淤工

費浩繁成功非易故有茨竹藩籬之議殊不知城垣之設所以防外患如必當建城雖重費何惜而臺灣變亂率自内生非禦外寇比不但城可以不建且建城實有所不可也臺郡門戶曰鹿耳門與府治近號稱天險港容三舟旁皆巨石鋒稜如劍戟舟行失尺寸頃刻沉沒內設礮臺可恃以為固其法最善從前平定鄭克塽朱一貴皆乘風潮舟行入港水高港平衆艘奔赴無所阻礙大兵一入即獲安平港之巨舟賊無去路而撫其府

市人民南北路商賈一聞官軍至絡繹捆載而來相依
以自保物力既充軍氣自倍賊進不能勝退無可守各
鳥獸散終無所逃遁故旬日可以坐定向使賊衆有城
可據收府治人民財物以自固大兵雖入攻之不拔坐
守安平曠日相持克敵不易蓋重洋形勢與內地異此
即明效大驗固未可更議建置也若謂臺灣築城即以
禦臺灣外寇是又不然從前兩征臺灣皆先整兵泊舟
於澎湖之南風澳以俟風潮風潮之便歲不過一時時

不過數日若盜賊竊發或外番窺伺泊舟澎湖則夕至而朝捕之矣至南北二路可通之地雖多然如南路之蜆港北路之八掌溪海翁港鹿仔港甲西二林三林中港竹塹蓬山惟小舟可入其巨港大舟可入者不過南路之打狗中港北路之上淡水其次則北路之笨港鹹水港去府治較遠縱有外寇亦不取道於此備設礮臺派撥汛兵朝夕巡視自足以資控禦今郝玉麟等請於現定城基之外栽種茨竹藉為藩籬實因地制宜甚有

裨益其淡水等處礮臺務須建造各屬竝應增修不可
惜費省工或致潦草應如何舉行之處著該督撫妥協
定議具奏

大清世宗敬天昌運建中表正文武英明寬仁信毅大孝
至誠憲皇帝聖訓卷三十一